

მემორანდუმი თანამშრომლობის შესახებ

ქ. თბილისი

15 აგვისტო 2019 წელი

ერთი მხრივ, ააიპ „ინფორმაციის თავისუფლების განვითარების ინსტიტუტი“ (შემდგომში – „ინსტიტუტი“), მისი აღმასრულებელი დირექტორის, გიორგი კლდიაშვილის, სახით, და მეორე მხრივ, სსიპ „ილიას სახელმწიფო უნივერსიტეტი“ (შემდგომში – „უნივერსიტეტი“), მისი რექტორის, გიგა ზედანიას, სახით, „ინსტიტუტი“ და „უნივერსიტეტი“ ინდივიდუალურად, ასევე მოხსენიებული, როგორც „მხარე“, ხოლო ერთობლივად, როგორც „მხარეები“, გამოხატავენ რა მზადყოფნას, რომ ხელი შეუწყონ ანტიკორუფციულ თემებზე საზოგადოებრივი ცნობიერების ამაღლებას, ასევე კორუფციის პრევენციასთან, კორუფციული რისკების იდენტიფიცირებასა და კორუფციულ ფაქტებზე ეფექტურ რეაგირებასთან დაკავშირებულ საკითხებზე სტუდენტების, სახელმწიფო, არასამთავრობო და ბიზნესის სექტორების წარმომადგენელთა ცოდნისა და უნარ-ჩვევების განვითარებას/გაღრმავებას, თანხმდებიან შემდეგზე:

მუხლი I. თანამშრომლობის ფარგლები

მემორანდუმი მიზნად ისახავს მხარეთა შორის პარტნიორული ურთიერთობის ჩამოყალიბებას, კორუფციასთან ბრძოლის სასერტიფიკატო პროგრამის (შემდგომში – „პროგრამის“) დანერგვისა და მუდმივი განვითარებისთვის.

მუხლი II. ზოგადი დებულებები

2.1 მემორანდუმი ხელს შეუწყობს მხარეთა ურთიერთობის კოორდინაციას პროგრამით განსაზღვრული აქტივობების დაგეგმვის, მათი განხორციელებისა და შეფასების ეტაპებზე;

2.2 მხარეები იღებენ პასუხისმგებლობას იმოქმედონ მემორანდუმის პირობებისა და მემორანდუმის საფუძველზე გაფორმებული სხვა ხელშეკრულებების შესაბამისად;

2.3 მხარეები აცხადებენ მზადყოფნას ხელი შეუწყონ ერთმანეთს პროგრამით განსაზღვრული აქტივობების განხორციელების პროცესში, მათ შორის პერიოდული და თემატური კომუნიკაციის გზით.

მუხლი III. პროგრამის განხორციელების თავისებურებები

მხარეები თანხმდებიან შემდეგზე:

3.1 უნივერსიტეტის მიერ პროგრამის დამტკიცების შემდეგ პროგრამა პირველ ნაკადს მიიღებს 2019 წლის შემოდგომის სემესტრში;

3.2 პროგრამის თითო ნაკადში მონაწილეობას მიიღებს 30-მდე ადამიანი. აქედან 10 მონაწილემდე შეირჩევა შიდა კანდიდატთა – უნივერსიტეტის სტუდენტთა შორის (ნებისმიერი ფაკულტეტიდან და ნებისმიერი საფეხურის), ხოლო დანარჩენი მონაწილეები შეირჩევიან გარე კანდიდატთა – სხვა უნივერსიტეტების სტუდენტთა, საჯარო მოხელეთა, ბიზნესისა და არასამთავრობო სექტორების წარმომადგენელთა შორის;

3.3 მონაწილეები სასერტიფიკატო პროგრამის წარმატებით დასრულებისთვის მიიღებენ კრედიტებს, ასევე მხარეთა მიერ გაცემულ ერთობლივ სერტიფიკატს;

3.4 პროგრამის მონაწილეებს მხარეები შეარჩევენ ერთობლივად, ერთობლივი განცხადების გამოქვეყნებისა და ღია, გამჭვირვალე და სამართლიანი შერჩევითი პროცესის განხორციელების გზით;

3.5 სასერტიფიკატო პროგრამა თითოეული ნაკადისათვის გრძელდება ორი სემესტრის განმავლობაში;

3.6 ლექციები ჩატარდება სამუშაო საათების შემდეგ, სამუშაო დღეებში.

მუხლი IV. მხარეთა შორის ურთიერთობები

4.1 მემორანდუმის განხორციელების პროცესში, ინსტიტუტი:

-უზრუნველყოფს კურსის ეფექტურ ადმინისტრირებას კოორდინატორის გამოყოფის გზით, რომელიც აწარმოებს კომუნიკაციას უნივერსიტეტის საკონტაქტო პირთან, პროგრამის ლექტორებთან, პროგრამაში მონაწილეობის მსურველ კანდიდატებსა და პროგრამის მონაწილეებთან;

-უზრუნველყოფს პროგრამის შესახებ ინფორმაციის გავრცელებას საკუთარი შესაძლებლობების ფარგლებში;

-უზრუნველყოფს სასწავლო მასალის მომზადებასა და ბეჭდვას;

-უზრუნველყოფს კურსის მონაწილეთა შერჩევის პროცესის ადმინისტრირებას;

-უზრუნველყოფს კურსის ლექტორების შერჩევას და მათი შრომის ანაზღაურებას;

-უნივერსიტეტთან კონსულტაციის შედეგად შექმნის მოდულების შემუშავების მეთოდს, რომელზე დაყრდნობითაც პოტენციური ლექტორები დაამუშავებენ მოდულების შინაარსს;

-უზრუნველყოფს ერთობლივი სერტიფიკატის დამზადებას;

-უზრუნველყოფს მონაწილეთა სერტიფიკატებით დაჯილდოების ცერემონიისთვის ქეითერინგს;

-უნივერსიტეტთან ერთად დაჯილდოების შემდეგ განიხილავს პროგრამის განხორციელების შედეგებს, გამოავლენს პროგრამის სუსტ და ძლიერ მხარეებს, ასევე განიხილავს გაგრძელების პერსპექტივას.

4.2 მემორანდუმის განხორციელების პროცესში უნივერსიტეტი:

-ინსტიტუტთან ეფექტური ურთიერთობისთვის გამოყოფს საკონტაქტო პირს, რომელთანაც კომუნიკაციას აწარმოებს პროექტის მენეჯერი ძირითადად ლოგისტიკურ საკითხებთან დაკავშირებით;

-უზრუნველყოფს პროგრამის შესახებ ინფორმაციის გავრცელებას საკუთარი შესაძლებლობების ფარგლებში;

-უზრუნველყოფს საკონტაქტო პირის ჩართულობას კურსის მონაწილეთა შერჩევის პროცესში;

-უზიარებს ინსტიტუტს იმ ინფორმაციას, რომელიც საჭიროა სასერტიფიკატო კურსის შესაქმნელად და შემდგომში დასამტკიცებლად;

-გამოყოფს შესაბამისი ინვენტარით აღჭურვილ კეთილმოწყობილ სალექციო ოთახს, რომელშიც დაეგევა 30 მონაწილე;

-პროგრამის გარე მონაწილეებისთვის უზრუნველყოფს წვდომას საგანმანათლებლო სივრცეზე (შენობაზე).

-მონაწილეთა სერტიფიკატებით დაჯილდოების ცერემონიისთვის გამოყოფს შესაბამის სივრცეს და უზრუნველყოფს უნივერსიტეტის ხელმძღვანელობის მონაწილეობას;

-ინსტიტუტთან ერთად დაჯილდოების შემდეგ განიხილავს პროგრამის განხორციელების შედეგებს, გამოავლენს პროგრამის სუსტ და ძლიერ მხარეებს, ასევე განიხილავს გაგრძელების პერსპექტივას.

მუხლი V. მემორანდუმის ძალაში შესვლა და მოქმედების დასრულება

5.1 მემორანდუმი ძალაში შევა მხარეთა მიერ მისი ხელმოწერის მომენტიდან და დაასრულებს მოქმედებას 2020 წლის 30 სექტემბერს.

5.2 ნებისმიერი ცვლილება მემორანდუმის ტექსტში შეთანხმებული უნდა იყოს მხარეთა შორის და განხორციელდეს მხოლოდ მხარეთა მიერ ხელმოწერის შედეგად.

მუხლი VI. ზოგადი დებულებები

6.1 მხარეთა შორის წარმოშობილი გაურკვევლობების შემთხვევაში, რაც გულისხმობს ასევე მემორანდუმით გათვალისწინებული ვალდებულებების ნაწილობრივ ან სრულად შეუსრულებლობას, მხარეები მაქსიმალურად უნდა ეცადონ მოლაპარაკებების გზით მოაგვარონ არსებული გაურკვევლობები. მოლაპარაკებების შეუძლებლობის შემთხვევაში, მხარეები ვალდებული არიან სრულად შეასრულონ პროგრამის მონაწილეთა მიმართ ნაკისრი ვალდებულებები.

6.2 მემორანდუმი ხელმოწერილია თანაბარი იურიდიული ძალის მქონე ორ ეგზემპლარად ქართულ ენაზე და ინახება მხარეებთან.

6.3 მემორანდუმის საფუძველზე წამოჭრილი ნებისმიერი დავა და უთანხმოება წყდება მოლაპარაკებების გზით. იმ შემთხვევაში, თუ დავა ვერ გადაწყდება საკითხის დასმიდან 30 კალენდარული დღის განმავლობაში, მხარე უფლებამოსილია მიმართოს სასამართლოს.

6.4 კორესპონდენცია მემორანდუმის განხორციელებასთან დაკავშირებით უნდა განხორციელდეს წერილობით შემდეგ მისამართებზე:

მხარეთა რეკვიზიტები

სსიპ „ილიას სახელმწიფო
უნივერსიტეტი“

აიპ ინფორმაციის თავისუფლების
განვითარების ინსტიტუტი

მის.: ქაქუცა ჩოლოყაშვილის გამზ. N3/5
თბილისი 0162, საქართველო
ტელ.: (995 32) 231 026; 294 197
ფაქსი: (995 32) 231 026, 220 009
ელფოსტა: uni@iliauni.edu.ge
ვებგვერდი: www.iliauni.edu.ge

მის.: ალექსანდრე გრიბოედოვის ქ. N 3,
თბილისი, 0108, საქართველო
ტელ.: +995 32 2 921514
ელფოსტა: info@idfi.ge
ვებგვერდი: www.idfi.ge

რექტორი
გიგა ზედანია



აღმასრულებელი დირექტორი
გიორგი კლდიაშვილი



ხელმოწერა: